

摘藻堂四庫全書薈要

史部

欽定四庫全書薈要卷六千三百八十三史部

元史卷四

明翰林學士亞中大夫知制誥兼修國史宋濂等修

本紀第四

世祖一

世祖聖德神功文武皇帝諱呼必賚睿宗皇帝第四子
母莊聖太后竒味氏以乙亥歲八月乙卯生及長仁明
英睿事太后至孝尤善撫下納鴻吉哩氏為妃歲甲辰

帝在潛邸思大有為於天下延藩府舊臣及四方文學之士問以治道歲辛亥六月憲宗即位同母弟惟帝最長且賢故憲宗盡屬以漠南漢地軍國庶事遂南駐扎固圖之地邢州有兩達爾罕言於帝曰邢吾分地也受封之初民萬餘戶今日減月削纔五七百戶耳宜選良吏撫循之帝從其言承制以托克托及張耕為邢州安撫使劉肅為高權使邢乃大治歲壬子帝駐桓撫間憲宗令斷事官伊囉幹齊與布扎爾等總天下財賦于燕

視事一日殺二十八人其一人盜馬者杖而釋之矣偶有獻環刀者遂追還所杖者手試刀斬之帝責之曰凡死罪必詳讞而後行刑今一日殺二十八人必多非辜既杖復斬此何刑也布扎爾錯愕不能對太宗朝立軍儲所于新衛以收山東河北丁糧後惟計直取銀帛軍行則以資之帝請于憲宗設官築五倉于河上始令民入粟宋遣兵攻虢之盧氏河南之永寧衛之八柳渡帝言之憲宗立經畧司於汴以莽格史天澤楊惟中趙壁

為使陳紀楊果為參議俾屯田唐鄧等州授之兵牛敵
至則禦敵去則耕仍置屯田萬戶於鄧完城以備之夏
六月入覲憲宗於察遜諾爾之地奉命帥師征雲南秋
七月丙午禡牙西行歲癸丑受京兆分地諸將皆築第
京兆豪侈相尚帝即分遣使戍興元諸州又奏割河東
解州鹽池以供軍食立從宜府于京兆屯田鳳翔募民
受鹽入粟轉漕嘉陵夏遣王府尚書姚樞立京兆宣撫
司以布琳及楊惟中為使關隴大治又立交鈔提舉司

印鈔以佐經用秋八月師次臨洮遣伊拉珠王君候王
鑑諭大理不果行九月壬寅師次塔拉分三道以進大
將烏蘭哈達率西道兵出晏當路諸王察罕伊兆爾帥
東道兵由白蠻帝由中道乙巳至滿陀城留輜重冬十
月丙午過大渡河又經行山谷二千餘里至金沙江乘
革囊及棧以渡摩娑蠻主迎降其地在大理北四百餘
里十一月辛卯復遣伊拉珠等使大理丁酉師至白蠻
打鄔寨其主將出降其姪堅壁拒守攻拔殺之不及其

民庚子次三旬辛丑白蠻送款十二月丙辰軍薄大理
城初大理主段氏微弱國事皆決於高祥高和兄弟是
夜祥率衆遁去命大將伊克及巴圖爾追之帝既入大
理曰城破而我使不出計必死矣己未西道兵亦至命
姚樞等搜訪圖籍乃得三使尸既瘞命樞為文祭之辛
酉南出龍首城次趙賧癸亥獲高祥斬于姚州留大將
烏蘭哈達戍守以劉時中為宣撫使與段氏同安輯大
理遂班師歲甲寅夏五月庚子駐六盤山六月以廉希

憲為關西道宣撫使姚樞為勸農使秋八月至自大理
駐桓撫間復立撫州冬駐扎固圖之地歲乙卯春復駐
桓撫間冬駐奉聖州北歲丙辰春三月命僧子聰卜地
于桓州東灤水北城開平府經營宮室冬駐于哈喇巴
勒噶遜之地憲宗命益懷州為分地歲丁巳春憲宗命
阿勒達爾劉太平會計京兆河南財賦大加鈎考其貧
不能輸者帝為代償之冬十二月入覲于伊克德呼蘇
之地議分道攻宋以明年為期歲戊午冬十一月戊申

馮牙于開平東北是日啟行歲己未春二月會諸王子

邢州夏五月駐小濮州徵東平宋子貞李昶訪問得失

秋七月甲寅次汝南命大將巴圖爾等前行備糧漢上

戒諸將毋妄殺命楊惟中郝經宣撫江淮筆且齊孫貞

督軍須蔡州有軍士犯法者貞縛致有司白于帝命戮

以徇諸軍凜然無敢犯令者八月丙戌渡淮辛卯入大

勝關宋戍兵皆遁壬辰次黃陂甲午遣廉希憲招臺山

寨比至千戶董文炳等已破之時淮民被俘者衆悉縱

之庚子先鋒察呼得宋沿江制置司榜來上有云今夏
謀者聞北兵會議取黃陂民船繫棧由陽邏堡以渡會
于鄂州帝曰此事前所未有願如其言辛丑師次江北
九月壬寅朔親王穆格自合州釣魚山遣使以憲宗凶
問來告且請北歸以繫天下之望帝曰吾奉命南來豈
可無功遽還甲辰登香鑪山俯瞰大江江北曰武湖湖
之東曰陽邏其南岸澣黃洲宋以大舟扼江渡及渡帝
遣兵奪二大舟是夜遣瑪拉噶齊張文謙等具舟楫乙

已遲明至江岸風雨晦冥諸將皆以為未可渡帝不從
遂申勅將帥揚旗伐鼓三道並進天為開霽與宋師接
戰者三殺獲甚衆逕達南岸軍士有擅入民家者以軍
法從事凡所俘獲悉縱之丁未遣王冲道李宗傑訾郊
招諭鄂城比至東門矢下如雨冲道墜馬為敵所獲宗
傑郊奔還帝駐澣黃洲己酉抵鄂屯兵教場庾戌圍鄂
壬子登城東北壓雲亭立望樓高可五丈望見城中出
兵趣兵迎擊生擒二人云賈似道率兵救鄂事起倉卒

皆非精銳遂命官取逃民棄糧聚之軍中為攻取計戊
午順天萬戶張柔兵至大將巴圖爾等以舟師趣岳州
遇宋將呂文德自重慶來巴圖爾等迎戰文德乘夜入
鄂城守愈堅冬十月辛未朔移駐烏龜山甲戌巴圖爾
還自岳十一月丙辰移駐牛頭山烏蘭哈達畧地諸蠻
由交趾厯邕桂抵潭州聞帝在鄂遣使來告時先朝諸
臣阿勒達爾琿塔噶托果斯托里齊等謀立額呼布格
額呼布格者睿宗第七子帝之弟也於是阿勒達爾發

兵於漠北諸部托里齊括兵於漠南諸州而阿勒達爾
乘傳調兵去開平僅百餘里皇后聞之使人謂之曰發
兵大事太祖皇帝曾孫珍戩在此何故不令知之阿勒
達爾不能答繼又聞托里齊亦至燕后即遣托歡額默
根馳至軍前密報請速還丁卯發牛頭山聲言趣臨安
留大將巴圖爾等帥諸軍圍鄂閏月庚午朔還駐青山
磯辛未臨江岸遣張文謙還諭諸將曰遲六日當去鄂
退保許黃洲命文謙發降民二萬北歸宋賈似道遣宋

京請和命趙璧等語之曰汝以生靈之故來請和好其
意甚善然我奉命南征豈能中止果有事大之心當請
於朝是日大軍北還己丑至燕托里齊方括民兵民甚
苦之帝詰其由托以憲宗臨終之命帝察其包藏禍心
所集兵皆縱之人心大悅是冬駐燕京近郊

中統元年春三月戊辰朔車駕至開平親王哈坦阿濟
格率西道諸王塔齊爾額森克呼魯古爾卓多率東道
諸王皆來會與諸大臣勸進帝三讓諸王大臣固請辛

卯帝即皇帝位以瑪穆特趙璧董文炳為燕京路宣慰使陝西宣撫使廉希憲言高麗國王嘗遣其世子倂入覲會憲宗將兵攻宋倂留三年不遣今聞其父已死若立倂遣歸國彼必懷德於我是不煩兵而得一國也帝是其言改館倂以兵衛送之仍赦其境內夏四月戊戌朔立中書省以王文統為平章政事張文謙為左丞以巴崇廉希憲商挺為陝西四川等路宣撫使趙良弼叅議司事鈕祜祿納罕張啟元為西京等處宣撫使己亥

詔諭高麗國王俱仍歸所俘民及其逃戶禁邊將勿擅
掠辛丑以即位詔天下詔曰朕惟祖宗肇造區宇奄有
四方武功迭興文治多缺五十餘年於此矣蓋時有先
後事有緩急天下大業非一聖一朝所能兼備也先皇
帝即位之初風飛雷厲將大有為憂國愛民之心雖切
於已尊賢使能之道未得其人方董夔門之師遽遺鼎
湖之泣豈期遺恨竟勿克終肆予冲人渡江之後蓋將
深入焉乃聞國中重以僉軍之擾黎民驚駭若不能一朝

居者予為此懼驛騎馳歸目前之急雖紆境外之兵未
戢乃會羣議以集良規不意宗盟輒先推戴左右萬里
名王巨臣不召而來者有之不謀而同者皆是咸謂國
家之大統不可久曠神人之重寄不可暫虛求之今日
太祖嫡孫之中先皇母弟之列以賢以長止予一人雖
在征伐之間每存仁愛之念博施濟衆實可謂天下主
天道助順人謨與能祖訓傳國大典於是乎在孰敢不
從朕峻辭固讓至於再三祈懇益堅誓以死請於是俯

徇輿情勉登大寶自惟寡昧屬時多艱若涉淵冰罔知
攸濟爰當臨御之始宜新弘遠之規祖述變通正在今
日務施實德不尚虛文雖承平未易遽臻而饑渴所當
先務嗚呼歷數攸歸欽應上天之命勲親斯託敢忘烈
祖之規體極建元與民更始朕所不逮更賴我遠近宗
族中外文武同心協力獻可替否之助也誕告多方體
予至意丁未以翰林侍讀學士郝經為國信使翰林待
制何源禮部郎中劉人傑副之使于宋丙辰收輯中外

官吏宣劄牌面遣特穆爾李舜欽等行部考課各路諸色工匠置急遞鋪乙丑徵諸道兵六千五百人赴京師宿衛置互市于漣水軍禁私商不得越境犯者死額呼布格僭號于和琳城西阿勒坦河名賈居貞張儼王煥完顏愈乘傳赴闕五月戊辰朔詔雅克特穆爾孟古岱節度黃河以西諸軍丙戌建元中統詔曰祖宗以神武定四方淳德御羣下朝廷草創未遑潤色之文政事變通漸有網維之目朕獲纘舊服載擴丕圖稽列聖之洪

規講前代之定制建元表歲示人君萬世之傳紀時書
王見天下一家之義法春秋之正始體大易之乾元炳
煥皇猷權輿治道可自庚申年五月十九日建元為中
統元年惟即位體元之始必立經陳紀為先故內立都
省以總宏綱外設總司以平庶政仍以興利除害之事
補偏救弊之方隨詔以頒於戲秉籙握樞必因時而建
號施仁發政期與物以更新敷宣懋惻之辭表著憂勞
之意凡在臣庶體予至懷詔安撫壽春府軍民甲午以

額呼布格反詔赦天下乙未立十路宣撫司以賽音諤

德齊李德輝為燕京路宣撫使徐世隆副之宋子貞為

益都濟南路宣撫使王磐副之河南路經畧使史天澤

為河南宣撫使楊果為北京路宣撫使趙昞副之張德

輝為平陽太原路宣撫使謝瑄副之博囉哈雅劉肅並

為真定路宣撫使姚樞為東平路宣撫使張肅副之中

書左丞張文謙為大名彰德路宣撫使游顯副之鈕祜

祿納罕為西京路宣撫使崔巨濟副之廉希憲為京兆

等路宣撫使以汪惟正為鞏昌等處便宜都總帥呼哩雅濟為鞏昌路元帥詔諭成都路侍郎張威安撫元忠綿資邛彭等州西川潼川隆慶順慶等府及各處山砦歸附官吏給宣命金符有差詔平陽京兆兩路宣撫司僉兵七千人於延安等處守隘以萬戶鄭鼎實喇孟古岱領之貧不能應役者官為資給徵諸路兵三萬駐燕京近地命諸路市馬萬匹送開平府以總帥汪良臣統陝西漢軍於沿河守隘立望雲驛非軍事毋得輒入焚

感入南斗留五十餘日六月戊戌詔燕京西京北京三路宣撫司運米十萬石輸開平府及撫州沙井靖州魚兒灤以備軍儲以李璫為江淮大都督劉太平等謀反伏誅并誅竒爾岱布哈於東川蜜喇卜和卓於西川璵塔噶反乙巳李璫言獲宋謀者言賈似道調兵聲言攻連州遣人覘之見許浦江口及射陽湖兵船二千艘宜繕理城塹以備罷阿勒達爾所簽解鹽戶軍百人壬子詔陝西四川宣撫司巴崇節制諸軍乙卯詔東平路萬

戶嚴忠濟等發精兵一萬五千人赴開平乙丑以石炭布為大理國總管佩虎符詔十路宣撫司造戰襖裘帽各以萬計輸開平是月召真定劉郁邢州郝子明彰德胡祗通燕京馮渭王光益楊恕李彥通趙和之東平韓文獻張昉等乘傳赴闕高麗國王王僖遣其子永安公僖判司宰事韓即來賀即位以國王封冊玉印及虎符賜之秋七月戊辰勅燕京北京西京真定平陽大名東平益都等路宣撫司造羊裘皮帽袴靴皆以萬計輸開

平已巳以萬戶史天澤扈從先帝有功賜銀萬五千兩
遣靈州種田民還京兆庚午賜山東行省大都督李壇
金符二十銀符五給所部有功將士癸酉以燕京路宣
慰使瑪穆特行中書省事燕京路宣慰使趙璧平章政
事張啟元參知政事王鶚翰林學士承旨兼修國史河
南路宣撫使史天澤兼江淮諸翼軍馬經畧使丙子詔
中書省給諸軍塔齊爾益都平州封邑歲賦金帛并以
諸王布呼實勒們所屬民戶人匠歲賦給之詔造中統

元寶交鈔立互市于潁州漣水光化軍北京路都統帥
阿哈乞免所部軍士征徭從之宋兵攻邊城詔遣太尹
竒味孟古岱率所部合兵擊之下詔褒賞行省大都督
李壇帝自將討額呼布格勅劉天麟規措中都柝津驛
傳馬八月丙午授中書左丞行大名等路宣撫使張文
謙虎符丁未詔都元帥耨埒所過毋擅捶掠官吏己酉
立秦蜀行中書省以京兆等路宣撫使廉希憲為中書
省右丞行省事宋兵臨漣州李壇乞諸道援兵癸丑賜

筆且齊塔爾琿銀二千五百兩李瓊乞遣將益兵渡淮
攻宋以方遣使修好不從癸亥澤州潞州旱民饑勅賑
之九月丁卯帝在準特爾格之地以額呼布格逆命下
詔諭中外乙亥李瓊復請攻宋復諭止之壬午初置拱
衛儀仗是月阿勒達爾率兵至西涼府與琿塔噶軍合
詔諸王哈坦哈必齊與總帥汪良臣等率師討之丙戌
大敗其軍于姑臧斬阿勒達爾及琿塔噶西土悉平冬
十月丁未李瓊言宋兵復軍于漣州癸丑初行中統寶

鈔戊午車駕駐錫衮之地命給官錢雇在京橐駝運米
萬石輸行在所十一月戊子發常平倉賑益都濟南濱
棣饑民十二月丙申以禮部郎中孟甲禮部員外郎李
文俊使安南大理乙巳李瓊上將士功命瓊以益都官
銀賞之帝至自和琳駐蹕燕京近郊始制祭享太廟祭
器法服以梵僧帕克斯巴為帝師授以玉印統釋教立
仙音院復改為玉宸院括樂工立儀鳳司又立符寶局
及御酒庫羣牧所升衛輝為總管府賜親王穆格銀二

千五百兩諸王阿齊台呼魯古爾哈坦呼喇珠星納噶

爾銀各五千兩文綺帛各三百匹金素半之諸王塔察

阿穆爾鈔各五十九錠有奇綿五千九十八斤絹五千

九十八匹文綺三百匹金素半之海都銀八百三十三

兩文綺五十匹金素半之多爾濟額布根銀八百五十

兩鄂爾和達銀五千兩文綺三百匹金素半之哲伯特

穆爾銀八百三十三兩兆圖卜穆爾銀五千兩文綺三

百匹金素半之道哩雅呼銀八百三十三兩特賜綿五

十斤阿濟格銀五千兩文綺三百金素半之先朝皇后
圖古哩克銀二千五百兩羅絨等折寶鈔二十三錠有
奇皇后安濟蘇銀二千五百兩烏爾古納妃子銀五千
兩自是歲以為常

二年春正月辛未夜東北赤氣照人大如席乙酉宋兵
圍漣州己丑李瓊率將士迎戰敗之賜詔獎諭給金銀
符以賞將士庚寅瓊發兵修益都城塹二月丁酉太
陰掩昴己亥宋兵攻漣水命阿珠等帥兵赴之丙午車

駕幸開平詔減免民間差發罷守隘諸軍秦蜀行省借
民錢給軍以今年稅賦償之免平陽太原軍站戶重科
租稅丁未詔行中書省平章瑪穆特及王文統等率各
路宣撫使赴闕丁巳李璫敗宋于沙湖堰三月壬戌朔
日有食之夏四月丙午詔軍中所俘儒士聽贖為民辛
亥遣弓工往教鄯闡人為弓乙卯詔十路宣撫使量免
民間課程命宣撫使官勸農桑抑游惰禮高年問民疾
苦舉文學才識可以從政及茂才異等列名上聞以聽

擢用其職官污濫及民不孝悌者量輕重議罰辛酉詔
太康督軍二千八百人戍蔡州以禮部郎中劉芳使大
理等國五月乙丑禁使臣毋入民家令止頓析津驛遣
崔明道李全義為詳問官詣宋淮東制司訪問國信使
郝經等所在仍以稽留信使侵擾疆場詰之庚辰勅使
臣及軍士所過城邑官給廩餼毋擾于民丁亥申嚴沿
邊軍民越境私商之禁唐慶子政臣入見詔復其家弛
諸路山澤之禁禁私殺馬牛申嚴越境私商販馬疋者

罪死以河南經略宣撫使史天澤為中書右丞相河南
軍民並聽節制詔成都路置惠民藥局遣王祐于西川
等路採訪醫儒僧道六月癸巳括漏籍老幼等戶協濟
編戶賦稅丙申賜新附人王顯忠王誼等衣物有差李
壇遣人獻漣水捷罷諸路拘收布疋齊禁諸王擅遣使
招民及徵私錢戊戌太陰犯角詔諭十路宣撫司并管
民官定鹽酒稅課等法癸卯以嚴忠範為東平路行軍
萬戶兼管民總管仍諭東平路達嚕噶濟等官並聽節

制詔定中外官所乘馬數各有差乙巳賑和索哩驛戶
之乏食者賞竒徹所部將校有功者銀二千五百兩及
幣帛有差己酉命竇默仍翰林侍講學士默與王鶚面
論王文統不宜在相位薦許衡代之帝不憚而罷辛亥
轉懿州米萬石賑親王塔齊爾所部饑民賜親王哈坦
所部軍幣帛九百匹布千九百匹乙卯勅平陽路安邑
縣蒲萄酒自今毋貢詔宣聖廟及管內書院有司歲時
致祭月朔釋奠禁諸官員使臣軍馬毋得侵擾褻瀆違

者加罪丙辰以汪良臣同簽鞏昌路便宜都總帥凡軍
民官並聽良臣節制丁巳敕詔路造人馬甲及鐵裝具
萬二千輸開平戊午詔毋收衛輝懷孟賦稅以償其所
借芻粟庚申宋瀘州安撫使劉整舉城降以整行夔府
路中書省兼安撫使佩虎符仍諭都元帥耜埒等使存
恤其民賜故金翰林修撰魏璠諡靖肅秦蜀行省言青
居山都元帥竒徹等所部將校有功詔降虎符一金符
五銀符五十七令行省銓定職名給之城臨洮陞真定

鼓城縣為晉州以鼓城安平武強饒陽隸焉賜僧子聰
懷孟邢州田各五十頃罷金銀銅鐵丹粉錫碌坑冶所
役民夫及河南舞陽薑戶藤花戶還之州縣賜大理國
主段實虎符優詔撫諭之命李瓊領益都路鹽課出工
局繡女聽其婚嫁懷孟廣濟渠提舉王允中大使楊端
仁鑿沁河渠成溉田四百六十餘所高麗國王僉更名
植遣其世子愜奉表來朝命宿衛將軍布爾察克禮部
郎中高逸民持詔往諭以玉帶賜之以布哈為中書右

丞相耶律鑄為中書左丞相張啟元為中書右丞授管

領宗慶府黎雅威茂邛灌七處軍民小太尉虎符秋七

月辛酉朔始立軍儲都轉運使司以摩和納為使周錯

為副使癸亥初立翰林國史院王鶚請修遼金二史又

言唐太宗置弘文館宋太宗設內外學士院今宜除拜

學士院官作養人才乞以右丞相史天澤監修國史左

丞相耶律鑄平章政事王文統監修遼金史仍採訪遺

事並從之賑和琳饑民賞鞏昌路總帥汪惟正將校斬

瑋塔噶功銀二千五百兩馬價銀四千九百兩諸王昌
通招河南漏籍戶五百命付之有司命總管王青製神
臂弓柱子弓諭河南管軍官於近城地量存牧場餘聽
民耕巴勒達爾乞於高麗鴨綠江西立互市從之乙丑
遣使持香幣祀嶽瀆丁丑渡江新附民留屯蔡州者徙
居懷孟貸其種食以萬嘉弩為安撫高麗軍民達噶噶
齊賜虎符庚辰西京宣德隕霜殺稼辛巳詔許衡即其
家教懷孟生徒命西京宣撫使造船備西夏漕運壬午

遣尼雅斯拉昂孟甲等使安南乙酉以牛驛雨雪道途
泥濘改立水驛己丑命鍊師王道歸真定築道觀賜名
玉華諭將士舉兵攻宋詔曰朕即位之後深以戢兵為
念故年前遣使於宋以通和好宋人不務遠圖伺我小
隙反啟邊釁東剽西掠曾無寧日朕今春還宮諸大臣
皆以舉兵南伐為請朕重以兩國生靈之故猶待信使
還歸庶有悛心以成和議留而不至者今又半載矣往
來之禮遽絕侵擾之暴不已彼嘗以衣冠禮樂之國自

居理當如是乎曲直之分灼然可見今遣王道貞往諭
卿等當整爾士卒礪爾戈矛矯爾弓矢約會諸將秋高
馬肥水陸分道而進以為問罪之舉尚賴宗廟社稷之
靈其克有勲卿等當宣布朕心明諭將士各當自勉毋
替朕命鄂州青山磯許黃洲所招新民遷至江北者設
官領之勅懷孟牧地聽民耕墾八月壬辰賜故金補闕
李大節諡貞肅丁酉命開平守臣釋奠于宣聖廟戊戌
以燕京路宣撫賽音諤德齊為平章政事勅以賀天爵

為金齒等國安撫使庫琳拜副之仍招諭使安其民己亥諭武衛軍都指揮使李伯祐汰本庫疲老者選精銳代之給海青銀符一有奏馳驛以聞辛丑以宣撫使鈕祜祿納罕為中書右丞庫庫為左丞賈文備為開元女直碩達勒達等處宣撫使賜虎符以宋降將王青為總管教武衛軍習射乙巳禁以俘掠婦女為娼丙午太白犯歲星以許衡為國子祭酒丁未以姚樞為大司農竇默乃翰林侍講學士先是以樞為太子太師衡為太子

太傅默為太子太保樞等以不敢當師傅禮皆辭不拜
故有是命初立勸農司以陳邃崔斌成仲寬鈕祜祿從
中為濱棣平陽濟南河間勸農使李士勉陳天錫陳膺
武孟古岱為邢洺河南東平涿州勸農使己酉命大名
等路宣撫使歲給翰林侍講學士竇默太醫副使王安
仁衣糧賜田以為永業甲寅賞董文炳所將渡江及北
征有功者二十二人銀各五十兩封順天等路萬戶張
柔為安肅公濟南路萬戶張榮為濟南公陝西四川行

省乞就決邊方重刑不允詔陝西四川行省存恤歸附
軍民詔自今使臣有矯稱上命者有司不得聽受諸王
后妃公主駙馬非聞奏不許擅取官物賜慶壽寺海雲
寺陸地五百頃勅西京運糧于沙井北京運糧于魚兒
泊立檀州驛頒斗斛權衡賑桓州饑民賜諸王塔齊爾
金千兩銀五千兩幣三百匹給阿實罕甲價銀千二百
兩核實新增戶口措置諸路轉輸法命劉整招懷夔府
嘉定等處民戶宋私商七十五人入宿州議置于法詔

宥之還其貨聽榷場貿易仍檄宋邊將還北人之留南者九月庚申朔詔以呼塔噶宅為中書省署奉遷祖宗神主于聖安寺癸亥邢州安撫使張耕告老詔以其子鵬翼代之武衛親軍都指揮使李伯祐董文炳言武衛軍疲老者乞補換仍存恤其家從之丙寅以鈕祜祿納罕行中興府中書省戊辰大司農姚樞請以儒人楊庸教孔顏孟三氏子孫東平府詳議官王鏞兼充禮樂提舉詔以庸為教授以鏞特兼太常少卿辛未以清滄鹽

課銀償往歲所貸民錢給公費者置和糴所于開平以戶部郎中宋紹祖為提舉和糴官丙子諭諸王駙馬凡民間詞訟毋得私自斷決皆聽朝廷處置河南民王四妻靳氏一產三男命有司量給贍養勅今歲田租輸沿河近倉官為轉漕不可勞民癸未以甘肅等處新糴兵革農民安業者為戍兵所擾遣阿實克焦端義往撫治之以海青銀符二金符十給中書省量軍國事情緩急付乘驛者佩之以開元路隸北京宣撫使真定路官民

所貸官錢貧不能償詔免之王鶚請於各路選委博學
老儒一人提舉本路學校特詔立諸路提舉學校官以
王萬慶敬鉉等三十人充之勅燕京順天等路續製人
甲五千馬甲及鐵裝具各二千冬十月庚寅朔詔鳳翔
府種田戶隸平陽兵籍毋令出征務耕屯以給軍餉辛
卯陝西四川行省上言軍務急速若待奏報恐失事機
詔與都元帥耨埒會議行之遣道士訾洞春代祀東海
廣德王廟壬辰敕和爾齊諾海率所部畧地淮西丁酉

敕阿巴等及陝西路宣撫司校覈博羅罕阿勒達爾所
貸官銀庚子以右丞張啟元行中書省於平陽太原等
路括西京兩路官民有壯馬皆從軍令宣德州楊庭訓
統之有力者自備甲仗無力者官與供給兩路鄂囉官
并在家軍人凡有馬者並付新軍劉總管統領昂吉所
管西夏軍并豐州葶麻林夏水阿嚙罕皆備鞍馬甲仗
及博羅罕所管兵凡徒行者市馬給之並令從軍違者
以失候軍期論修燕京舊城命平章政事趙璧左三部

尚書克呼木率蒙古漢軍駐燕京近郊太行一帶東至平灤西控關陝應有險阻於附近民內選諳武事者修立堡寨守禦以河南屯田萬戶史權為江漢大都督依舊戍守又選銳卒三千付史樞管領於燕京近郊屯駐壬寅命亳州張柔歸德邸浹睢州王文幹水軍解成張榮實東平嚴忠嗣濟南張宏七萬戶以所部兵來會罷東平會計前任官侵用財賦甲辰宋兵攻瀘州劉整擊敗之詔賞整銀五千兩幣帛二千匹錫爾丹劉元振守

禦有功各賞銀五百兩將士銀萬兩幣帛千匹乙巳詔
指揮副使鄭江將千人赴開平指揮使董文炳率善射
者千人由魚兒泊赴行在指揮使李伯祐率餘兵屯潮
河川壬子詔和木哈齊爾岱等自得勝口至中都預備
糧餉芻粟丙辰詔平章政事塔齊爾率軍士萬人由古
北口西便道赴行在所十一月壬戌大兵與額呼布格
遇於實默圖諾爾之地諸王哈坦等斬其將哈坦和爾
齊及其兵三千人塔齊爾與哈必齊等復分兵奮擊大

破之追北五十餘里帝親率諸軍以躡其後其部將阿
陶等降額呼布格北遁庚午太陰犯昴壬申詔免今年
賦稅癸酉駐蹕特默哈喇之地以尚書克呼木平章趙
璧兼大都督率諸軍從塔齊爾北上分蒙古軍為二克
呼木從穆蘇出居庸口駐宣德德興府諾海從阿固岱
出古北口駐興州帝親將諸萬戶漢軍及武衛軍由檀
順州駐潮河川敕官給芻糧毋擾居民罷十路宣撫司
止存開元路命諸路市馬二萬五千餘匹授蒙古軍之

無馬者丁丑徵諸路宣撫司官赴中都移蹕於蘇默哈

達地詔漢軍屯懷來晉山鷹坊阿里沙及阿薩爾兄弟

二人以擅離扈從伏誅十二月庚寅詔封皇子珍戩為

燕王領中書省事辛卯熒惑犯房壬辰熒惑犯鈞鈴癸

巳以昌撫哈里泊等處薦罹兵革免今歲租賦甲午師

還詔撤所在戍兵放民間新簽軍命太常少卿王鏞教

習大樂壬寅以隆寒命諸王哈必齊所部軍士無行帳

者聽舍民居命陝蜀行中書省給綏德州等處屯田牛

種農具初立宮殿府秩正四品專職營繕立尚食局尚
藥局初設控鶴五百四人以劉德為軍使領之立異樣
局達嚕噶齊掌御用織造秩正三品給銀印賜諸王金
銀幣帛如歲例是歲天下戶一百四十一萬八千四百
九十有九斷死罪四十六人

元史卷四

元史卷四考證

命大將伊克及巴圖爾追之 巴圖爾原文作拔突兒
他卷又作拔都兒又作霸突兒八都兒今併改

中統元年遣特穆爾李舜欽等行部 特穆爾原文作

帖木兒各卷有作某某帖木兒某某鐵穆爾某某帖
睦耳者今併改

蒙古岱 原文作忙古帶他卷又作忙兀帶忙古斛忙
古歹蒙古斛今併改

鄂爾和達 原文作兀魯忽帶他卷又作忽魯帶又作

兀魯兀台今併改

哲伯特穆爾 原文作只必帖木兒他卷又作制必帖


兒執畢帖木兒今併改

高麗國王僂更名植 原文作植據高麗傳改後

做此

遇于實默圖諾爾之地 實默圖原文作昔木土他卷

又作失木土昔門禿失木禿又作石木温都今併改



總校官編修 臣 吳紹滋

欽定四庫全書薈要

史部

元史卷五至
七



詳校官主事銜臣徐以坤

欽定四庫全書薈要卷六千三百八十四 史部

元史卷五

明翰林學士亞中大夫知制誥兼修國史宋濂等修

本紀第五

世祖二

三年春正月癸亥修宣聖廟成庚午罷高麗互市諸王塔齊爾請置鐵冶從之請立互市不從呼魯古爾所部民饑罷上供羊命銀冶戶七百河南屯田戶百四十賦

稅輸之州縣命匠戶為軍者仍為軍其軍官當考第富
貧存恤無力者耶律鑄詣北京餉諸王軍仍遣宣撫使
柴禎等增價糴米三萬石益之賜高麗國歷辛未禁諸
道戍兵及勢家縱畜牧犯桑棗禾稼者癸酉以軍興人
民勞苦勅停公私逋負毋徵癸未賜廣寧王卓多駝鈕
金鍍銀印及諸王哈必齊行軍印宋制置使賈似道以
書誘總管張元等李璫獲其書上之丙戌命江漢大都
督史權亳州萬戶張弘彥將兵八千赴燕備宮懸鍾磬

樂舞籥翟凡用三百六十二人高麗遣使奉表來謝優
詔答之李璫質子彥簡逃歸二月丁亥朔元籍軍竄名
為民者命有司還正之括諸道逃亡軍已丑李璫反以
連海三城獻于宋盡殺蒙古戍軍引麾下趨益都前宣
撫副使王磐脫身走至濟南驛召磐令姚樞問計磐對
豎子狂妄即成擒耳帝然之庚寅宋兵攻新蔡辛卯始
定中外官俸命大司農姚樞講定條格甲午李璫入益
都發府庫犒其將校乙未詔諸道以今歲民賦市馬丙

申郭守敬造寶山漏成徙至燕京以興松雲三州隸上都辛丑李壇遣騎寇蒲臺癸卯詔發兵討之以趙壁為平章政事修深冀南宮棗強四城甲辰發諸蒙古漢軍討李壇命水軍萬戶解成張榮實大名萬戶王文幹及萬戶嚴忠範會東平濟南萬戶張宏歸德萬戶邨浹武衛軍礮手元帥薛軍勝等會濱隸詔濟南路軍民萬戶張宏濱隸路安撫使韓世安各修城塹盡發管內民為兵以備召張柔及其子弘範率兵二千詣京師丙午命

諸王哈必齊總督諸軍以布扎爾額布根及趙璧行中書省事於山東宋子貞參議行中書省事董源高逸民為左右司郎中許便宜從事真定順天河間平灤大名邢州河南諸路兵皆會濟南以中書左丞庫庫尚書克哱木宣撫游顯行宣慰司於大名沼磁懷孟彰德衛輝河南東西兩路皆隸焉己酉王文統坐與李璫同謀伏誅仍詔諭中外王演等以妖言誅辛亥勅元帥阿哈分兵戍平灣海口及東京廣寧懿州以餘兵詣京師詔諸

道括逃軍還屯田嚴其禁壬子李璫據濟南癸丑詔大名沼磁彰德衛輝懷孟河南真定邢州順天河間平灤諸路皆籍兵守城宋兵攻滕州丙辰詔巴圖摩多將息州戍兵詣濟南移其民於蔡州東平萬戶嚴忠範留兵戍宿州及蘄縣以餘兵自隨三月戊午詔非中書省文移及兵民官申省者毋許入遞己未括穆蘓愛滿輝和爾伊魯勒昆達實密等戶丁為兵庚申括北京鷹坊等戶丁為兵蠲其賦令趙炳將之辛酉準巴圖言河南有

自願從軍者即命將之遣鄭鼎沙木斯鼎達哩岱索多
行宣慰司事于平陽太原簽見任民官及捕鷹坊人匠
等軍徙弘州錦工繡女子京師勅河東兩路元括金州
兵付鄭鼎將之以平章政事瑪穆特廉希憲叅政商挺
斷事官穆蘇行中書省于陝西四川獲私商南界者四
十餘人命釋之勅燕京至濟南置海青驛凡八所壬申
命戶部尚書劉肅專職鈔法平章政事賽音諤德齊兼
領之以薩奇蘓柴禎行宣慰司事于北京免今歲絲銀止

輸田租癸酉命史樞阿珠各將兵赴濟南遇李璫軍擊破
之斬首四千璫退保濟南乙亥宋將夏貴攻符離戊寅萬
戶韓世安率鎮撫馬興千戶張濟民大破李璫兵於
高苑獲其權府傅珪賜濟民興金符詔以李璫兵敗諭諸
路禁民間私藏軍器壬午以輝和爾字書給驛璽書免
西京今年絲銀稅甲申免高麗酒課乙酉宋夏貴攻
蘄縣諭諸路管民官毋令軍馬使臣入州城村居鎮市
擾及良民夏四月丙戌朔大軍樹柵鑿塹圍璫于濟

南丁亥詔博興高苑等處軍民嘗為李瑄脅從者並釋
其罪庚寅命克呼木安撫張耕分邢州戶隸兩達爾
罕辛卯修河中禹廟賜名建極宮壬辰以大梁府渠州
路軍民總帥蒲元圭為東夔路經略使丙申宋華路分
湯太尉攻徐邳二州詔分張柔軍千人還戍亳州庚子
江漢大都督史權以趙百戶挈衆逃歸斬之詔自今部
曲犯重罪鞫問得實必先奏聞然後寘諸法詔安輯徐
邳民禁征戍軍士及勢官毋縱畜牧傷其禾稼桑棗以

米千石牛三百給西京蒙古戶癸卯宋兵攻亳州甲辰
命行中書省宣慰司諸路達嚕噶齊管民官勸誘百姓
開墾田土種植桑棗不得擅興不急之役妨奪農時乙
巳以北京廣寧豪懿州軍興勞弊免今歲稅賦命諸路
詳讞冤獄詔河東兩路并平陽太原路達嚕噶齊及兵
民官撫安軍民各安生業毋失歲計丁未李璫遣柴牛
免招諭部民盧廣廣縛以獻殺之以廣權威州軍判兼
捕盜官戊申賜諸王額森克金印庚戌賜諸王哈必齊

金銀海青符各二免松山興州望雲縣新舊差賦以望
雲松山興州課程隸開平府壬子勅非軍情毋行望雲
驛乙卯河南路王谿子張無僧杜信等謀為不軌並伏
誅詔右丞相史天澤專征諸將皆受節度五月戊午蘄
縣陷權萬戶李義千戶張好古死之庚申築環城圍濟
南壇不復得出詔薩奇蘓安撫益都路百姓各務農功
仍禁蒙古漢軍剽掠癸亥史權妄奏徐邳總管李誥格
完復邳州城詔由誥格以下並原其罪時宋將夏貴攻

邳州誥格出降貴既去誥格自陳能保全州城史權以聞故有是命甲子宋兵攻利津縣蠲濱棣今歲田租之半東平蠲十之三自燕至開平立牛驛給鈔市車牛戊辰以左丞相和爾布哈兼中書省都斷事官賜虎符真定順天邳州蝗以平章政事賽音諤德齊兼領工部及諸路工作以孟烈所獻蹶張弩藏于中都丙子晉山至望雲立海青驛丁丑李誥格等伏誅命史天澤選考徐邳總管甲申真定路巴雅爾哈雅殺造偽鈔者三人讓

其違制之罪西京宣德咸寧龍門霜天順平陽河南真定雨雹東平濱棣旱詔覈實逃戶輸納絲銀稅租戶口增者賞之隱匿者罪之逃民苟免差稅重加之罪大司農姚樞辭赴省議事帝勉留之命樞與左三部尚書劉肅依前商議中書省事六月乙酉朔宋兵攻滄州雅州瀘山民既降復叛命誅其首亂者七人餘令安業割遼河以東隸開元路戊子濱棣安撫使韓世安敗宋兵于濱州丁河口己丑遣塔齊爾帥兵擊宋軍仍安諭瀕海

軍民乙未禁女直侵軼高麗國民其使臣往還官為護
送命博索府屯田軍移駐鴨綠江之西以防海道丙申
高麗國王王禎遣使來貢壬寅陝西行省言西京宣德
太原匠軍困乏乞以民代之有旨軍籍已定不宜動搖
宜令貧富相資果甚貧者令休息一歲癸卯太原總管
李穀努克達魯噶齊戴齊蘓等領李瑄偽檄傳行旁郡
事覺誅之勅武寧軍歲輸所產鐵河西民及諸王和斯
濟勒所部軍之食給鈔賑之壬子申嚴軍官及兵伍擾

民之禁癸丑立小峪蘆子寧武軍赤泥泉鐵冶四所東平
嚴忠濟向為民貸錢輸賦四十三萬七千四百定借用
課程鈔本鹽課銀萬五千餘兩詔勿徵秋七月戊午復
蒙古軍站戶差賦農民包銀徵其半停戶止令輸絲
民當輸賦之月毋徵私債勅私市金銀應支錢物止以
鈔為準丙寅賜夔州路行省揚大淵金符十銀符十九
賞麾下將士別給海青符二事有急速馳以上聞立槍
杆嶺驛以便輸轉癸酉甘州饑給銀以賑之甲戌李瑄

窮蹙投大明湖水中不即死獲之併蒙古軍囊嘉特伏
誅體解以徇戊寅以夔府行省劉整行中書省於成都
潼川兩路仍賜銀萬兩分給軍士之失業者八月己丑
郭守敬請開玉泉水以通漕運廣濟河渠司王允中請
開邢沼等處漳滏澧河達泉以溉民田並從之甲午博
多歡等奏請以宣德州德興府等處銀冶付其匠戶歲
取銀及石綠丹粉輸官從之丙午立諸路醫學教授戊
申勅王鶚集廷臣商榷史事鶚等乞以先朝事蹟錄付

史館河間平灤廣寧西京宣德北京隕霜害稼九月戊
午亳州萬戶張弘畧破宋兵于蘄縣復宿蘄二城以侍
衛親軍都指揮使董文炳兼山東路經略使收集益都
舊軍充武衛軍戍南邊詔益都行省大都督薩奇蘇與
董文炳會議兵民籍每十戶惟取其二充武衛軍其海
州東海漣水移入益都者亦隸本衛己未罷霸州海青
驛安南國陳光晒遣使貢方物壬戌改邢州為順德府
立安撫司泃磁威三州隸焉聽太原民食小鹽歲輸銀

七千五百兩已巳以摩和納餉軍有功授禮部尚書賜
金符壬申授安南國王陳光昞及達嚕噶齊納喇丹虎
符勅濟南官吏凡軍民公私逋負權閣毋徵癸酉都元
帥庫庫岱卒于軍以其兄阿珠代之授虎符將南邊蒙
古漢軍閏月甲申朔沙肅二州乏食給米鈔賑之丁亥
立古北口驛己丑濟南民饑免其賦稅免諸路軍戶他
徭庚寅勅京師順州至開平置六驛辛卯嚴忠範奏請
補東平路廟學太常樂工從之勅武衛軍及黑軍會于

京師庚子中翼千戶玖珠破宋兵于虎腦山庚戌發粟三十萬賑濟南饑民冬十月丙辰放金州所屯軍士二千人及大明河南新簽防城軍為民庚申分益都軍民為二董文炳領軍薩竒蘇治民禁諸王使臣師旅敢有恃勢擾民者所在執以聞詔以李瑄所掠民馬還其主以郝經劉人傑使宋未還廩其家中書省奏與宋互市庶止私商及復逋民之陷于宋者且覘漣海二州不允以劉人傑不附李瑄擢益都路總管仍以金帛賜之壬

戊授益都行中書省都督府所統州郡官金符十七銀符十一乙丑詔禁京畿畋獵丙寅分東西兩川都元帥府為二以托迪及劉整等為都元帥及左右副都元帥詔責高麗欺慢之罪又詔賜高麗王植歷以戰功賞渠州達魯噶齊王章等金五十兩銀一千五百五十兩賞閻蓬等路都元帥合州戰功銀五千兩丁卯詔鳳翔府屯田軍隸兵籍仍屯田鳳翔放刁國器所簽平陽軍九百一十五人為民間蓬廣安順慶夔府等路都元帥奇

徹戍青居山請益兵詔陝西行省及鞏昌總帥汪惟正以兵益之戊辰楊大淵乞於利州大安軍以鹽易軍糧從之庚午勅鞏昌總帥汪惟正將戍青居軍還屯田利州乙亥分中書左右部丁丑勅宿州百戶王達等所擒宋王用夏珍等八人赴京師命伯嘉努所將質子軍入侍戊寅命布魯魯所統固安平灤質子軍自益都徙還故地詔益都府路官吏軍民為李壇脅從者並赦其罪勅萬戶嚴忠範修復宿州蘄縣萬戶呼圖克輝圖何總

管修完邳州城郭十一月乙酉太白犯鈎鈴丁亥勅聖

安寺作佛頂金輪會長春宮設金籙周天醮辛丑日有

背氣重暈三珥敕濟南人民為李壇裨校掠取財物者

詣都督薩奇蘇所訟之真定民郝興讐殺馬忠忠子榮

受興銀令興代其軍役中書省以榮納賂忘讐無人子

之道杖之沒其銀事聞詔論如法有司失出之罪俾中

書省議之三又沽竈戶經宗兵焚掠免今年租賦汰少

府監工匠存其良者千二百戶遣官審理陝西重刑敕

河西民徙居應州其不能自贍者百六十戶給牛具及粟麥種仍賜布人二匹乙巳詔都元帥阿珠分兵三千人同額森布哈輝圖兵馬復立宿州蘄縣邳州有旨諭史天澤朕或乘怒欲有所誅殺卿等宜遲留一二日覆奏行之丙午詔特徵人員宜令乘傳戊申陞撫州為隆興府以實喇諤都為總管割宣德之懷安天成及威寧高原隸焉十二月甲寅封皇子珍戩為燕王守中書令丙辰敕諸王塔齊爾等所部獵戶止收包銀其絲稅輸

之有司立河南山東統軍司以塔爾琿和爾齊為河南
路統軍使盧昇副之東距亳州西至均州諸萬戶隸焉
察克布哈為山東路統軍使武秀副之西自宿州東至
寧海諸萬戶隸焉罷各路急遞鋪丁已立十路宣慰使
以真定路達魯噶齊趙瑁等為之己未犯罪應死者五
十三人詔重加詳讞辛酉詔給懷州新民耕牛二百俾
種水田立諸路轉運司以燕京路監榷官曹澤等為之
使癸亥享太廟詔各路總管兼萬戶者止理民事軍政

勿預其州縣官兼千戶百戶者仍其舊乙丑復立息州
城以安其民召真定順德等路宣慰使王磐乘傳赴京
師丙寅申嚴屠殺牛馬之禁己巳詔諸路管民總管子
弟有分管州府司縣及膺坊人匠諸色事務者罷之壬
申遣使收輯諸路軍民官海青牌及驛券戊寅詔諸路
管民官理民事管軍官掌兵戎各有所司不相統攝作
佛事於昊天寺七晝夜賜銀萬五千兩割北京興州隸
開平府建行宮于隆興路陞太原臨泉縣為臨州降寧

陵為下縣仍隸歸德賜諸王金銀幣帛如歲例是歲天下戶一百四十七萬六千一百四十六斷死罪六十六人

四年春正月乙酉禁蒙古軍馬擾民宋賈似道遣楊琳齎空名告身及蠟書金幣誘大獲山楊大淵南歸大淵部將執琳詔誅之以宋和爾穆爾及沙津回回鷹坊等兵戍商州藍田諸隘軍民官各從統軍司及宣慰司選舉岳天輔乞復立息州不允丙戌以姚樞為中書左丞

改諸路監榷課稅所為轉運司甲午給公主巴古符印
其所屬設達嚕噶齊給鈔賑益都路貧民之無牛者立
十路鄂囉總管丁酉益都路行省大都督薩奇蘇上李
壇所傷漣水軍民及陷宋蒙古女直特默齊軍數男女
凡七千九百二十二人癸卯領部阿哈瑪特請興河南
等處鐵冶設東平等路巡禁私鹽軍從之召商挺趙良
弼赴闕乙巳敕李平陽以所部西川出征軍士戍青居
山其各翼軍在青居山者悉還成都詔陝西行軍塔喇

海等收恤離散軍戶詔以諸路漢軍鄂囉母隸各萬戶管領其科徵差稅山東河南隸統軍司東西兩川隸征東元帥府陝西隸行戶部凡鄂囉官內有各萬戶弟男及私人皆罷之敕總帥汪忠臣都元帥托迪及劉整等益兵付都元帥竒徹戍青居山仍以解州鹽課給軍糧丙午詔諸翼萬戶簡精兵四千充武衛軍罷古北口新置驛增萬戶府監戰一員叅議一員以瑪哈穆特所俘濟南老僧口之民文面為奴者付元籍為民汪忠臣史

權械宋諜者六人至京師有旨釋之辛亥申禁民家兵器及蒙古軍擾民者陵州達嚕噶齊莽格戰死濟南以其子孟古岱襲職召雲頂山侍郎張威赴闕二月壬子朔命河東宣慰司市馬百二十九匹賜諸王巴拉軍士之無馬者甲寅詔諸路官員子弟入質以高麗不荅詔書詰其使者以民杜了翁先朝舊功復其家庚申賞萬戶齊喇所部將士討李壇有功者銀二千七百五十兩甲子車駕幸開平以王德素充國信使劉公諒副之使

于宋致書宋主詰其稽留郝經之故詔諸路置局造軍器私造者處死民間所有不輸官者與私造同三月戊子沂州胡節使范同知陷于宋命存恤其家或言其嘗為宋兵嚮導乃分其妻孥資產賜有功將士辛卯救薩奇蘇招集益都逃民命董文炳以所獲宋謀及俘八十人赴隆興府聽諸路獵戶及捕盜巡鹽者執弓矢壬辰遣扎瑪里鼎和糴東京己亥諸路包銀以鈔輸納其絲料入本色非產絲之地亦聽以鈔輸入凡當差戶包

銀鈔四兩每十戶輸絲十四斤漏籍老幼鈔三兩絲一
斤庚子伊克德勒岱請修瓊華島不從壬寅關東蒙古
漢軍官未及訓教者令各乘傳赴開平癸卯初建太廟
乙巳賜德沁諾延等銀七千九十兩命北京元帥阿哈
發漢軍二千人赴開平己酉高麗國王王植遣其臣朱
英亮入貢上表謝恩復立宿州夏四月庚戌朔以漏籍
戶一萬一千八百附籍戶四千三百於各處起治歲課
鐵四百八十萬七千斤癸丑選益都兵千人充武衛軍

甲寅償河西阿實克賑所部貧民銀三千七百兩己未以完顏端田宅賜益都千戶傅國忠國忠父天祐為端所殺故命以其田宅賜之宣德至開平置驛罷開元路宣慰司丙寅西京武州隕霜殺稼戊寅召寶默許衡乘驛赴開平諸王阿濟格所部貧民遠徙者賜以牛馬車幣以東平為軍行蹂踐賑給之改滄清深鹽提領所為轉運司王鶚請延訪太祖事蹟付史館五月癸未詔北京運米五千石赴開平其車牛之費並從官給乙酉初

立樞密院以王子燕王守中書令兼判樞密院事戊子陞
開平府為上都其達魯噶齊烏勒希為上都路達魯噶
噶齊總管董銓為上都路總管兼開平府尹辛卯詔立
燕京平準庫以均平物價通利鈔法乙未敕商州民就
成本州毋禁弓矢丙申立上都馬步驛丁酉以元帥楊
大淵張大悅復神山有功降詔獎諭戊戌詔以禮部尚
書摩和納乃兼領潁州光化互市及領已括戶三千興
煇鐵冶歲輸鐵一百三萬七千斤就鑄農器二十萬事易

粟四萬石輸官河南隨處城邑市鐵之家令仍舊鼓鑄
庚子河南路總管劉克興矯制括戶罷其職籍家資之
半陞上都路望雲縣為雲州松山縣為松州賞前討瑛
塔噶戰功薩里圖庫庫楚等鈔二千一百七十四錠幣帛
一千四百二十匹六月壬子河間益都燕京真定東平
諸路蝗乙卯以管民官兼統懷孟等軍阿薩爾戰歿
汴梁授其子孟古岱為萬戶佩金符戊午賜錫津田戶
六百己未賜高麗國王王植羊五百癸酉賜巴古公主所

部鈔千錠立上都惠民藥局建帝堯廟於平陽仍賜田
十五頃以錫津為中書右丞相塔濟爾為中書左丞相秋
七月癸未詔諸投下毋擅勾攝燕京路州縣官吏乙酉
禁野狐嶺行營民毋入南北口縱畜牧損踐桑稼給公
主巴古銀五萬兩哈喇哈納銀千兩乙未以故東平權
萬戶呂義死王事賜謚貞節戊戌詔弛河南沿邊軍
器之禁陞燕京屬縣安次為東安州固安為固安州河
南統軍司言屯田民為保甲丁壯射生軍凡三千四百

人分戍沿邊州郡乞蠲他徭從之庚子詔賜諸王卓多
牛馬價銀六萬三千一百兩壬寅詔禁益都路特默齊
擾民以成都經畧司隸西川行院禁蒙古漢軍諸人煎
販私鹽詔山東經畧司徒膠萊莒密之民及竈戶居內
地中書省臣以妨煮鹽為言遂令統軍司完復邊戍居
民竈戶毋徙詔阿珠戒蒙古軍不得以民田為牧地燕
京河間開平隆興四路屬縣雨雹害稼八月戊申朔詔
和木哈總管諸路驛佩金符辛亥置元帥府于大理詔

東平大名河南宣慰司市馬千五百五十匹給阿珠等
軍陞宣德州為宣德府隸上都以淄萊登三州為總管
府治淄州命錫勒希總制鬼國大理兩路兵部郎中劉
芳前使大理至吐蕃遇害命恤其家壬子命中書省給
北京西京轉運司車馬價鈔彰德路及洺磁二州旱免
彰德今歲田租之半洺磁十之六冀州蒙古百戶阿實
克等犯鹽禁沒入馬百二十餘匹以給軍士無馬者甲
寅命成都路運米萬石餉潼川給鈔付劉整市牛屯田

分劉元禮等軍戍潼川命阿敦將之丙辰詔以成都路
綿州隸潼川戊午以阿陶高挺行樞密院於成都凡成
都順慶潼川都元帥府並聽節制庚申以史天倪前為
武僊所殺以武僊第賜其子楫癸亥敕京兆路給賜劉
整第一區田二十頃以茂巴爾所部貧乏賜銀七千五
百兩給之甲子以西涼經兵居民困弊給鈔賑之仍免
租賦三年敕諸臣傳旨有疑者須覆奏丙寅以諸王哲
伯特穆爾部民困乏賜銀二萬兩給之壬申復置急遞

鋪濱棣二州蝗真定路旱詔西涼流民復業者復其家
三年車駕至上都九月壬午河南大名兩路宣慰司
所獲宋謀王立張達刁俊等十八人遇赦釋免給衣服
遣還乙酉立漕運河渠司己丑賜諸王阿濟格所部種
食牛具庚寅諭高麗上京等處毋重科斂民招諭濟南
濱棣流民遣使徵諸路賦稅錢帛民間所賣布帛有疎
薄狹短者禁之冬十月戊午初置隆興路驛十一月甲
申詔以歲不登量減阿蘇寄味各軍行餉東平大名等

路旱量減今歲田租丙戌享于太廟以哈坦塔齊爾王
磐張文謙行事高麗國王王植以免置驛籍民等事遣
其臣韓就奉表來謝賜中統五年歷并蜀錦一仍命植
入朝立御衣尚食二局十二月丁未朔以鳳翔屯軍汪
惟正青居等軍刁國器平陽軍令益都元帥竒徹統之
戌虎嘯寨甲戌敕駙馬阿爾布哈蒲萄戶依民例輸賦
雅爾喀幹達實密僧道種田入租貿易輸稅丙子賜諸王
金銀幣帛如歲例是歲天下戶一百五十七萬九千一

百一十賦絲七十萬六千四百一斤鈔四萬九千四百八十七錠斷死罪七人

至元元年春正月丁丑朔高麗國王王植遣使奉表來賀壬午敕諸路宣慰司非奉旨無輒入覲以千戶張好古歿王事命其弟好義好禮並襲職為千戶癸巳以益都武衛軍千人屯田燕京官給牛具以鄧州保甲軍二千三百二十九戶隸統軍司戊戌揚大淵進花羅紅邊絹各百五十段優詔諭之己亥立諸路平準庫癸卯命

諸王位下工匠已籍為民者並徵差賦儒釋道伊嚕勒
昆達實密等戶舊免租稅今並徵之其蒙古漢軍站戶
所輸租減半西北諸王率部民來歸勅北京西京宣慰
司隆興總管府和羅以備糧餉築冷水河城命千戶托
歡等戍之罷南邊互市申嚴持軍器販馬越境私商之
禁二月辛亥賀福等六人告平陽太原漏籍戶詔賞以
官廷臣以非材對給鈔與之勅選儒士編修國史譯寫經
書起館舍給俸以贍之壬子修瓊華島發北京都元

帥阿哈所領軍疏雙塔漕渠甲寅以故亳州千戶郎閔
陷于宋命其子榮祖襲職丙辰罷陝西行戶部丁卯太
陰犯南斗癸酉車駕幸上都詔諸路總管史權等二十
三人赴上都大朝會弛邊城軍器之禁三月庚辰設周
天醮于長春宮己亥命尚書宋子貞陳時事子貞條具
以聞詔獎諭命中書省議行之辛丑詔四川行院命阿
陶專掌軍政其刑名錢穀商挺任之立漕運司以王光
益為使夏四月戊申以彰德洺磁路引漳滏水灌田

致御河淺澀鹽運不通塞分渠以復水勢辛亥太陰犯
軒轅御女星壬子東平太原平陽旱分遣西僧祈雨已
卯詔高麗國王王植來朝上都修世見之禮辛酉以四
川茶鹽商酒竹課充軍糧揚大淵以部將王仲得宋將
咎萬壽書殺之詔以其事未經鞫問或墮宋人行間之
計豈宜輒施刑戮詰責大淵仍存恤仲家御苑官囊嘉
特請修駐驛涼樓并廣牧地詔涼樓俟農隙牧地分給
農之無田者丁卯追治李璫逆黨萬戶張邦直兄弟及

姜郁李在等二十七人罪戊辰給新附戍軍糧餉高麗
國王王植遣其臣金祿來貢五月乙亥遣蘇爾托音郭
守敬行視西夏河渠俾具圖來上庚辰勅劍州守將分
軍守劍門置驛於人頭山丙戌太陰犯房丁亥釋宋私
商五十七人給糧遣歸其國己丑以平陰縣尹馬欽發
私粟六百石贍饑民又給民粟種四百餘石詔獎諭特
賜西錦五端以旌其義乙未初置四川急遞鋪丙申賜
諸王竒徹銀萬兩濟其所部貧戶己亥太陰犯昴以中

書右丞鈕祜祿納罕為平章政事邛部川六番安撫招
討使都王明亞為鄰國建都所殺敕其子伯佗襲職賜
金符六月乙巳召王鶚姚樞赴上都宋制置夏貴率兵
欲攻虎嘯山敕以萬戶舒穆魯紉扎拉一軍益竒徹戍之
戊申高麗國王王植來朝秋七月甲戌彗星出與鬼昏
見西北貫上台掃紫微文昌及北斗旦見東北凡四十
餘日以阿哈瑪特言益解州鹽課均賦諸色僧道軍匠
等戶其太原小鹽聽民便癸未改新鳳州為徽州以西

番十八族部立安西州行安撫司事丁亥諸王算齊所
部營帳軍民被火發粟賑之庚寅給諸王伊蘇布哈印
壬辰特詔諭鞏昌路總帥汪惟正勞勉之賜元寶交鈔
三萬貫仍戍青居賜諸王裕隆哈實印仍以先朝獵戶
賜之丁酉龍門禹廟成命侍臣阿哈托音代祀己亥定
用御寶制凡宣命一品二品用玉三品至五品用金其
文曰皇帝行寶者即位時所鑄惟用之詔誥別鑄宣命
金寶行之庚子額哷布格自實默圖之敗不復能軍至

是與諸王裕隆哈實阿實達錫里濟其所謀臣布拉噶呼察圖們阿爾察托果斯等來歸詔諸王皆太祖之裔並釋不問其謀臣布拉噶等皆伏誅八月壬寅朔陝西行省臣上言川蜀戍兵軍需請令鄂囉官徵入官庫移文於近戍官司依數取之宋新附民宜撥地土衣糧給其牛種仍禁邊將分匿人口商州險要乞增戍兵陝西獵戶移獵商州河西鳳翔屯田軍遷戍興元四川各翼軍有地者徵其稅給無田者糧皆從之甲辰詔秦蜀行

省發銀二十五萬兩給沿邊歲用乙巳立諸路行中書
省以中書左丞相耶律鑄叅知政事張惠等行省事詔
新立條格省併州縣定官吏員數分品從官職給俸祿
頒公田計月日以考殿最均賦役招流移禁勿擅用官
物勿以官物進獻勿借易官錢勿擅科差役凡軍馬不
得停泊村坊詞訟不得隔越陳訴恤鰥寡勸農桑驗雨
澤平物價具盜賊囚徒起數月申省部又頒陝西四川
西夏中興北京三處行中書條格定立諸王使臣驛傳

稅賦差發不許擅招民戶不得以銀與非投下人為諤
都禁口傳勅旨及追呼省臣官屬詔蒙古戶種田有馬
牛羊之家其糧住支無田者仍給之庚戌命燕王署勅
諸王設僚屬及說書官諸站戶限田四頃免稅供驛馬
及祇應命各路總管府兼領其事癸丑命僧子聰同議
樞密院事詔子聰復其姓劉氏易名秉忠拜太保叅領
中書省事乙卯詔改燕京為中都其大興府仍舊增都
省叅佐掾史月俸丙辰劉秉忠王鶚張文謙商挺言燕

王既署相銜宜於省中別置幕位每月一再至判署朝
政其說書官皇子明安以李盤為之諾木罕以高道為
之丁巳以改元大赦天下詔曰應天者惟以至誠拯民
者莫如實惠朕以菲德獲承慶基內難未戡外兵未戢
夫豈一日于今五年賴天地之畀矜暨祖宗之垂裕凡
我同氣會於上都雖此日之小康敢朕心之少肆比者
星芒示儆雨澤愆常皆闕政之所繇顧斯民之何罪宜
布惟新之令溥施在宥之仁據布拉噶呼察圖們阿爾

察托果斯輩構禍已照依太祖皇帝扎薩克正典刑訖
可大赦天下改中統五年為至元元年於戲否往泰來
迓續亨嘉之會鼎新革故正資輔弼之良咨爾臣民體
予至意戊午給益都武衛軍千人冬衣己未鳳翔府龍
泉寺僧超過等謀亂遇赦沒其財羈管京兆僧司同謀
蘇德令從軍自効發萬戶舒穆魯紮拉所部千人赴
商州屯田亳州軍六百八人及河南府軍六十人助奇
徹戍青居勅山東經略副使武秀選益都新軍千人充

武衛軍赴中都城郊以沂州監戰塔斯萬戶孟義所部
兵戍之太原路總管伊埒益古岱坐藏甲匿戶罷職為
民九月壬申朔立翰林國史院以改元詔諭高麗并赦
其境內辛巳車駕至上都庚寅益都毛璋謀逆二子
及其黨崔成並伏誅籍其家貲賜行省薩奇蘇冬十月
壬寅朔高麗國王王禎來朝乙巳禁上都畿內捕獵庚
戌有事于太廟壬子恩州歷亭縣進嘉禾一莖五穗戊
辰改武衛軍為侍衛親軍十一月丙子詔宋人歸順及

北人陷沒來歸者皆月給糧食辛巳征古桂先是濟喇
敏內附其國東有古桂伊里裕兩部歲來侵疆故往征
之乙丑以至元二年歷賜高麗國王王植禁登州和州
等處并女直人入高麗界剽掠辛卯召衛州太一五
代度師李居素赴闕壬辰罷領中書左右部併入中
書省以領中書省左右部兼諸路都轉運使知太府監
事阿哈瑪特為平章政事領中書省左右部兼諸路都
轉運使阿里為中書右丞丁酉太原路臨州進嘉禾二莖

以元帥阿敦劉整劉元禮竒徹等將士獲功賞賚有差
十二月乙巳罷各投下達嚕噶齊定中外百官儀從丁
未勅遣宋謀者四人還其國戊午賞巴圖軍人銀五十
萬兩甲子太陰犯房乙丑以王鑑昔使大理沒於王事
其子天赦不能自存優恤之丁卯勅鄧州沿邊增立菜
蕪常平建陵季陽四堡戊辰命選善水者一人沿黃河
計水程達東勝可通漕運馳驛以聞庚午詔罷樞密院
斷事官及各路鄂囉官令總管府兼總押所始罷諸侯

世守立遷轉法是歲真定順天涖磁順德大名東平曹
濮州泰安高唐濟州博州德州濟南濱棣淄萊河間大
水賜諸王金銀幣帛如歲例戶一百五十八萬八千一
百九十五斷死罪七十三人

元史卷五

元史卷五考證

三年以興松雲三州隸上都 按四年紀云五月庚子
陞上都路望雲縣為雲州松山縣為松州地理志亦
云望雲縣中統四年陞為雲州則是時尚未有雲州
之名此云興松雲三州牽連誤書也至松山陞州地
理志亦以為中統三年事與紀不合未知孰是

免松州興州望雲縣新舊差賦 縣原文謫州今改正

說見前

左丞相和爾布哈 左原文謚右據宰相表改

濱棣安撫使韓世安 原文謚安世據上文改

改邢州為順德府立安撫司治磁威三州隸焉 按地

理至元元元年以洺州磁州屬順德府與紀不合

建行宮於隆興路 原文謚興隆據地理志改

四年陞開平府為上都 地理志作五年考中統紀元

止有四年明年即改元至元係志誤

命阿敦將之 原文作按敦他卷又作按東今併改

至元元年賜諸王玉隆哈實印 按諸王表玉隆哈實
於三年始賜印與紀不合

錫里濟 原文作昔里給他卷又作昔里吉失列吉又
訛作失吉列今併改

欽定四庫全書薈要卷六千三百八十五 史部

元史卷六

明翰林學士亞中大夫知制誥兼修國史宋濂等修

本紀第六

世祖三

二年春正月辛未朔日有食之癸酉山東廉訪使言真
定路總管張宏前在濟南乘變盜用官物詔以宏嘗告
李璫反免宏死罪罷其職徵贓物償官邳州萬戶張邦

直等違制販馬並處死勅徙鎮海巴勒巴沁謙州諸色
匠戶於中都給銀萬五千兩為行費又徙諾觀特木德
克礮手人匠八百名赴中都造船運糧己卯北京路行
省給扎拉齊戶東徙行糧萬石以鄧州監戰諾海新舊
軍萬戶董文炳並為河南副統軍甲申詔申嚴越界販
馬之禁違者處死乙酉以河南北荒田分給蒙古軍耕
種戊子諸王塔齊爾使臣庫庫楚至北京哈陶驛手殺
驛吏郝用郭和尚有旨徵鈔十錠給其主贖死庚寅城

西番希達路癸巳布敦竒爾部雅蘇來朝貢銀鼠皮二千賜金素幣各九帛十有八武城縣王氏妻崔一產三男丁酉給親王裕隆哈實部民糧二千石高麗國王王植遣其弟公珣奉表來貢二月辛丑朔元帥阿敦與宋兵戰于釣魚山敗之獲戰艦百四十六艘甲辰初立宮闡局戊申賜親王烏嚕克台河間王印給所部米千石丁巳幸上都癸亥并六部為四以敏珠爾丹為吏禮部尚書馬亨戶部尚書嚴忠範兵刑部尚書帕嚕鼎工部

尚書禁山東東路私煎硝磺甲子以蒙古人充各路達
魯噶齊漢人充總管回回人充同知永為定制以同知
東平路宣慰使寶赫鼎為平章政事山東廉訪使王晉為
參知政事廉希憲商挺罷詔併諸王哲伯特穆爾所設
管民官屬詔諭總統所僧人通五大部經者為中選以
有德業者為州郡僧錄判正副都綱等官仍於各路設
三學講三禪會三月癸酉古桂國人襲殺濟喇敏部兵
勅以官粟及弓甲給之丁亥勅邊軍習水戰屯田誅宋

諜李富住乙未罷南北互市括民間南貨官給其直遼
東饑發粟萬石鈔百錠賑之夏四月戊午賜諸王哈必
齊伊奇哩金素幣各四拜牲金幣一五月壬午賞萬戶
和琳岱爾所部征吐蕃功銀四百五十兩戊子禁北京
平灤等處人捕獵庚寅令軍中犯法不得擅自誅戮罪
輕斷遣重者聞奏勅上都商稅酒醋諸課毋徵其椎鹽
仍舊諸人自願徙居永業者復其家詔西川山東南京
等路戍邊軍屯田閏五月癸卯升脩縣為景州辛亥檢

覈諸王烏魯克台部民無孳畜者三萬七百二十四人
人月給米二斗五升四閱月而止丙辰雅州碉門宣撫
使請復碉門城邑詔相度之癸亥移秦蜀行省於興元
丙寅命四川行院分兵屯田丁卯分四親王南京屬州
鄭州隸哈坦鈞州隸明埒睢州隸博囉齊蔡州隸海都
他屬縣復還朝廷以平章政事趙璧行省于南京河南
府大名順德洛磁彰德懷孟等路平章政事廉希憲行
省事于東平濟南益都淄萊等路中書左丞姚樞行省

事于西京平陽太原等路詔諸路州府若自古名郡戶數繁庶且當衝要者不須改併其戶不滿千者可併則併之各投下者併入所隸州城其散府州郡戶少者不須更設錄事司及司候司附郭縣止令州府官兼領括諸路未占籍戶任差職者以聞六月戊辰朔新得州安撫向良言頃以全城內附元領軍民流散南界者多欲歸順並乞招徠從之又勅良以所領新降軍民移戍通江縣行新得州事辛未賜阿珠所部馬價鈔一千二十

三錠有奇丙子太陰犯心大星戊寅移山東統軍司於沂州萬戶重喜立十字路復正陽命圖喇戍之己卯以淇州隸懷孟路高麗國王王植遣其臣榮膺伯奉表來賀聖誕節千戶庫庫楚部民乏食賜鈔賑之王晉罷樞密院臣言各路出征逃亡漢軍及貧難未起戶并投下隱匿事故者宜一槩發遣應役從之勅行院及諸軍將校卒伍須正身應役違者罪之秋七月辛酉益都大蝗饑命減價糴官粟以賑癸亥安南國王陳光昞遣使奉

表來貢甲子詔賜光晒至元三年歷八月丙子濟南路
鄒平縣進芝草一本戊寅高麗國王王植遣使來貢方
物己卯諸宰職皆罷以安圖為中書右丞相巴延為中
書左丞相戊子召許衡於懷孟楊誠於益都車駕至自
上都九月戊戌以將有事太廟取大樂工於東平預習
儀禮勅江淮沿邊樹柵徐宿邳三州助役徒庚子皇孫
特穆爾生丁巳賞諸王哲伯特穆爾麾下河西戰功銀
二百五十兩冬十月己卯享于太廟癸未勅順天張柔

東平嚴忠濟河間馬總管濟南張林太原舒穆魯總管
等戶改隸民籍統軍招布哈萬戶輝圖麾下軍所俘宋
人九十三口官贖為民其私越禁界掠獲者四十五人
許令親屬完聚並種田內地戊子詔隨路私商曾入南
界者首實免罪充軍十一月丙申召李昶於東平辛丑
賜諸王哲伯特穆爾銀二萬五千兩鈔千錠癸丑賞楊
文安戰功金五十兩所部軍銀六百兩及幣帛有差甲
子詔事故貧難軍不堪應役者以兩戶或三戶合併正

軍一名其丁單力備者許顧人應役十二月己巳省併
州縣凡二百二十餘所庚午宋子貞言朝省之政不宜
數行數改又刑部所掌事干人命尚書嚴忠範年少宜
選老於刑名者為之又請罷北京行中書省別立宣慰
司以控制東北州郡並從之禁朝省告許以息爭訟辛
未以諸王伊蘇布哈所部戍西番軍屢有戰功賞銀三
百兩癸酉召張德輝於真定圖克坦公履於衛州丁丑
詔諭高麗賜至元三年厯癸未賜劉秉忠金五十兩甲

申賜巴延宋子貞楊誠銀千兩鈔六十錠丁亥勅選諸

翼軍富强才勇者萬人充侍衛親軍己丑瀆山太玉海

成勅置廣寒殿是歲戶一百五十九萬七千六百一絲

九十八萬六千二百八十八斤包銀鈔五萬七千六百

八十二錠賜諸王金銀幣帛如歲例彰德大名南京河

南府濟南淄萊太原弘州電西京北京益都真定東平

順德河間徐宿邳蝗旱太原霜災斷死罪四十二人

三年春正月乙未高麗國王王植遣使來賀丙午遣多木

達趙璧撫諭四川將吏軍民壬子立制國用使司以阿
哈瑪特為使癸丑選女直軍二千為侍衛軍四川行樞
密院謀取嘉定請益兵命多木達趙璧摘諸翼蒙古漢
軍六千人付之二月丙寅廉希憲宋子貞為平章政事
張文謙為中書左丞史天澤為樞密副使癸酉立瀋州
以處高麗降民壬午平陽路僧官以妖言惑眾伏誅以
中書右丞張易同知制國用使司事參知政事張惠為
制國用副使癸未車駕幸上都甲申罷西夏行省立宣

慰司初製太常禮樂工冠服立東京廣寧懿州開元率
賓海蘭博索等路宣撫司乙酉蠲中都今年包銀四分
之一詔理斷阿珠部下所俘人口畜牧及其草地為民
侵種者以制國用使司條畫諭中外官吏三月辛巳分
衛輝路為親王裕隆哈實分地戊戌賑碩達勒達饑已
未王晉及侍中和爾扎實濟南益都轉運使王明以隱
匿鹽課皆伏誅夏四月丁卯五山珍御榻成置瓊華島
廣寒殿亳州水軍千戶胡進等領騎兵渡淝水逾荆山

與宋兵戰殺獲甚衆賞鈔幣有差庚午勅僧道祈福於
中都寺觀詔以僧機為總統居慶壽寺己卯申嚴瀕海
私鹽之禁勅宮燭毋彩繪五月乙未遣使諸路慮囚庚
子勅太醫院領諸路醫戶惠民藥局辛丑以黃金飾渾
天儀丙午浚西夏中興漢延唐來等渠凡良田為僧所
據者聽蒙古人分墾丙辰罷益都行省蠲平灤益都質
子戶賦稅之半六月丁卯封皇子諾木罕為北安王以
印給之辛未徙歸化民於清州興濟縣屯田令官給牛

具壬申賜劉整畿內地五十頃癸酉以千戶扎拉沒于
王事賜其妻銀二百五十兩丙子立漕運司戊寅以陝
西行省平章賽音諤德齊等政事修治賜銀五千兩命
山東統軍副使王仲仁督造戰船于汴申嚴陝西河南
竹禁立拱衛司秋七月丙申罷息州安撫司壬寅詔上
都路總管府遇巡幸行留守司事車駕還即復舊丙午
遣使祀五嶽四瀆甲寅添內外巡兵外路每百戶選中
產者一人充之其賦令餘戶代輸在都增武衛軍四百

已未以崞代堅臺四州隸忻州詔令西夏避亂之民還
本籍成都新民為豪家所庇者皆歸之州縣詔招集逃
亡軍限百日詣所屬陳首原其罪貧者併戶應役八月
癸亥賜丞相巴延第一區丁卯以兵部侍郎赫德禮部
侍郎殷弘使日本賜書曰皇帝奉書日本國王朕惟自
古小國之君境土相接尚務講信修睦況我祖宗受天
明命奄有區夏遐方異域畏威懷德者不可悉數朕即
位之初以高麗無辜之民久瘁鋒鏑即令罷兵還其疆

場反其旄倪高麗君臣感戴來朝義雖君臣而歡若父子計王之君臣亦已知之高麗朕之東藩也日本密邇高麗開國以來時通中國至於朕躬而無一乘之使以通和好尚恐王國知之未審故特遣使持書布告朕心冀自今以往通問結好以相親睦且聖人以四海為家不相通好豈一家之理哉以至用兵夫孰所好王其圖之又詔高麗導去使至其國戊子高麗國王王植遣其大將軍朴琪來賀聖誕節阿珠畧地蘄黃俘獲以萬計

九月戊午車駕至自上都冬十月庚申朔降德興府為
奉聖州癸亥高麗使還以王植病詔和藥賜之丁丑徙
平陽經籍所于京師更勅牒舊式太廟成丞相安圖巴
延言祖宗世數尊諡廟號增祀四世各廟神主配享功
臣法服祭器等事皆宜定議命平章政事趙璧等集羣
臣議定為八室申禁京畿畋獵壬午命制國用使司造
神臂弓千張矢六萬十一月辛卯初給京府州縣司官
吏俸及職田戊戌瀕御河立漕倉丁未申嚴殺牛馬之

禁宋子貞致仕辛亥以呼圖克岱爾為中書左丞相禁天文圖讖等書丙辰千戶沙卜珠丹以嗜酒失所守大良平罪當死錄前功免死令往東川軍前自效詔建都使復歸朝又詔嘉定等府沿江一帶城堡早降又詔四川行樞密院遣人告諭江漢庸蜀等處順具官吏姓名對階換授有功者遷有才者用民無生理者以衣糧賑之願遷內地者給以田廬毋令失所十二月庚申給諸王哈必齊行軍印辛酉詔改四川行樞密院為行中

書省以賽音諤德齊伊蘇岱爾等僉行省事甲子立諸路洞冶所以梁成生擒宋總轄官授同知開府事佩金符減輝州竹課先是官取十之六至是減其二丁亥詔安肅公張柔行工部尚書段天祐等同行工部事修築宮城併太府監入宣徽院仍以宣徽使專領監事詔賜高麗以至元四年歷日仍慰諭之建大安閣于上都鑿金口導盧溝水以漕西山木石勅諸越界私商及謀人與偽造鈔者送京師審覈是歲天下戶一百六十萬九

千九百三東平濟南益都平灤真定洺磁順天中都河
間北京蝗京兆鳳翔旱斷死罪九十六人賜諸王金銀
幣帛如歲例

四年春正月甲午陝西行省以開州新得復失請益兵
勅平陽延安等處簽民兵三千人山東河南懷孟潼川
調兵七千人益之丁酉申嚴平陽等處私鹽之禁壬寅
立察蘇圖水十四驛癸卯勅修曲阜宣聖廟乙巳百濟
遣其臣梁浩來朝賜以錦繡有差禁僧官侵理民訟辛

亥封安肅公張柔為蔡國公以趙壁為樞密副使立諸
路洞冶都總管府癸丑勅封實默圖山為武定山其神
曰武定公泉為靈淵其神曰靈淵侯僉蒙古軍戶二丁
三丁者出一人為軍四丁五丁者二人六丁七丁者三
人乙卯高麗國王王植遣使來朝詔撫慰之戊午立提
點宮城所析上都隆興府自為一路行總管府事立開
元等路轉運司城中都二月庚申鈕祐祿納罕復為平
章事阿里復為中書右丞丁卯改經籍所為弘文院以

馬天昭知院事丁亥括西夏民田徵其租帝幸上都詔
陝西行省招諭宋人又詔嘉定瀘州重慶夔府涪達忠
萬及釣魚禮義大良等處官吏軍民有率衆來降者優
加賞擢三月己丑復以耶律鑄為中書左丞相辛卯自
潼關至蘄縣立河渡官八員以察姦偽乙未勅中都路
建習樂堂使樂工肄業其中己亥賜皇子珍馔莽噶拉
木諾木罕和克齊銀三萬兩辛丑夏津縣大雨雹壬寅
安圖言此者省官員數平章左丞各一員今丞相五人

素無此例臣等議擬設二丞相臣等蒙古人三員惟陛下命詔以安圖為長史天澤次之其餘蒙古漢人參用勿令員數過多又詔宜用老成人如姚樞等一二員同議省事丁巳耶律鑄制宮縣樂成詔賜名大成夏四月甲子新築宮城辛未遣使祀岳瀆五月丁亥朔日有食之勅上都重建孔子廟乙未應州大水丙申威州山後大番斯隆瑪等十一族來附賜璽書金銀符已酉以捕獵戶達嚕噶齊偽造銀符處死壬子勅諸路官吏俸令

包銀民戶每四兩增納一兩以給之丙辰析東平之博
州五城別為一路六月壬戌以中都順天東平等處蠶
灾免民戶絲料輕重有差乙丑史天澤復為中書左丞
相呼圖克岱爾耶律鑄並降平章政事巴延降中書右
丞廉希憲降中書左丞阿里張文謙並降參知政事乙
酉賜諸王裕隆哈實銀五千兩幣三百歲以為常罷宣
徽院赫德殷弘以高麗使者宋君斐金贊不能導達至
日本來奏降詔責高麗王王植仍令其遣官至彼宣布

以必得要領為期秋七月丙戌朔勅自中興路至西京
之東勝立水驛十戌戌罷息州安撫岳林以其民隸南
京路罷懷孟路安撫李宗傑以其民隸本路發鞏昌鳳
翔京兆等處未占籍戶一千修治四川山路橋梁棧道
大名路達嚕噶齊愛魯克總管張弘範等盜官錢罷之
壬寅申嚴京畿牧地之禁甲寅詔額齊訥新附貧民從
人借貸困不能償者官為償之仍給牛具種實及糧食
簽東京軍千八百人充侍衛軍八月庚申填星犯天罇

辛酉申嚴平灤路私鹽酒醋之禁丙寅復立宣徽院以
前中書右丞相錫津為使丁丑封皇子和克齊為雲南
王賜駝鈕金鍍銀印壬午太白犯軒轅大星命克們征
建都高麗國王王植遣其秘書監郭汝弼來賀聖誕節
阿珠略地至襄陽俘生口五萬馬牛五千宋人遣步騎
來拒阿珠率騎兵敗之九月壬辰作玉殿于廣寒殿中
乙未總帥汪良臣請立寨於毋章德山控扼江南以當
釣魚之衝從之戊申以許衡為國子祭酒安南國王陳

光晒遣使來貢優詔答之立大理等處行六部以庫庫
岱為尚書兼雲南王傅柴禎尚書兼府尉甯源侍郎兼
司馬庚戌遣雲南王和克齊鎮大理鄯闡茶罕章赤禿
哥兒金齒等處詔撫諭吏民又詔諭安南國俾其君長
來朝子弟入質編民出軍役納賦稅置達魯噶齊統治
之癸丑申嚴西夏中興等路僧尼道士商稅酒醋之禁
車駕至上都王鶚請立選舉法有旨令議舉行有司
難之事遂寢冬十月辛酉制國用司言布格濟山石絨

織為布火不能然詔採之壬戌賜駙馬布哈銀印魚通
崑州等處達魯噶齊李福招諭西番諸族酋長以其民
入附以阿努班迪噶等為和隆武等處總管授璽書及
金銀符鐵旗城後番官官扎蘭遣其子達朗持先受憲
宗璽書金符乞改授新命從之甲子歲星犯軒轅大星
辛未太原進嘉禾二本異畝同穎甲戌賑新附民陳忠
等鈔丁丑制國用使司請量節經用從之庚辰定品官
子孫廕敘格十一月乙酉享于太廟戊戌立新蔡縣以

呼察李嘉努統所部兵戍之甲辰立夔府路總帥府戍
開州乙巳填星犯天罇距星申嚴京畿畋獵之禁南京
宣慰劉整赴闕奏攻宋方略宜先從事襄陽十二月甲
戌賞河南路統軍使諾海所部將士戰功銀九千六百
五十兩鈔幣鞍勒有差丙子賑親王伊遜克所部饑民
丁丑給遼東新簽軍布六萬匹己卯立遼東路水驛七
賞元帥阿珠部下有功將士二千二十五人銀五萬五
千三百兩金五十兩錦綵鞍勒有差庚辰簽女直碩達

勒達軍三千立諸位鄂拓克總管府省平陽路岳陽和
州二縣入冀氏復置霸州益津縣省安西路櫟陽縣入
臨潼是歲天下戶口一百六十四萬四千三十山東河
南北諸路蝗順天東鹿縣旱免其租斷死罪一百十四
人賜諸王金銀幣帛如歲例

五年春正月甲午太陰犯井庚子上都建城隍廟辛丑
勅陝西五路四川行省造戰艦五百艘付劉整高麗國
王王植遣其弟渴來朝詔以植飾辭見欺面數其事於

温切責之復遣北京路總管約蘇圖及禮部郎中孟甲
持詔往諭令具表遣海陽公金俊侍郎李藏用與去使
同來以聞庚戌賜高麗國新厯閏月戊午以陳亳頰蔡
等處屯田戶充軍令益都漏籍戶四千淘金登州栖霞
縣每戶輸金歲四錢二月戊子太陰犯天關己丑太陰
犯井給河南山東貧乏軍士鈔戌戌改軍器局為軍器
監辛丑百戶温都蘇駐營濟南路屬縣三年脅取民飲
食糧料當粟五千石勅杖決之仍償粟千石析甘州路

之肅州自為一路三月丙寅罷諸路四品以下子孫入
質者田禹妖言赦減死流之遠方禁民間兵器犯者驗
多寡定罪甲子敕克們率兵二千招諭建都壬申改母
章德山為定遠城武羣山為武勝軍丁丑敕阿里等詣
軍前閱視軍籍罷諸路女直契丹漢人為達魯噶齊者
回回輝和爾奈曼唐古人仍舊夏四月壬寅遣使祀嶽
瀆五月辛亥朔以太醫院拱衛司教坊司尚食尚果尚
醞三局隸宣徽院癸亥都元帥伯嘉努拔宋嘉定五花

石城白馬三砮癸亥賜諸王和和及巴喇噶幣帛六萬
匹六月辛巳朔濟南王保和以妖言惑衆謀作亂勅誅
首惡五人餘勿論甲申中山大雨雹阿珠言所領者蒙
古軍遇山水砮柵非漢軍不可宜令史樞率漢軍協力
征進從之戊申東平等處蝗已酉封諸王寶竒特濟為
河平王賜駝鈕金印秋七月辛亥召翰林直學士高鳴
順州知州劉瑜中都郝謙李天輔韓彥文李祐赴上都
以山東統軍副使王仲仁戍眉州壬子詔陝西統軍司

兼領軍民錢穀罷各路鄂囉官令管民官兼領癸丑立

御史臺以右丞相塔齊爾為御史大夫詔諭之曰臺官

職在直言朕或有未當其極言無隱毋憚他人朕當爾

主仍以詔諭天下立高州北二驛戊辰罷西夏宣撫司

庚午省諸路打捕鷹坊工匠洞冶總管府令轉運司兼

領之丙子立西夏惠民局高麗國王王植遣其臣崔東

秀來言備兵一萬造船千隻詔遣都統領多托爾往閱

之就相視黑山日本道路仍命耽羅別造船百艘以伺

調用詔四川行省賽音怕德齊自利州還京兆立東西
二川統軍司以劉整為都元帥與都元帥阿珠同議軍
事整至軍中即建議築白河口鹿門山許之罷軍中諸
司參議八月乙酉程思彬以投匿名書言斥乘輿伏誅
己丑亳州大水庚子敕京師瀕河立十倉命孟古岱率
兵六千征西番建都九月癸丑中都路水免今年田租
罷中都路和顧所丁巳阿珠統兵圍樊城敕長春宮修
設金籙周天大醮七晝夜建堯廟及后土太寧宮庚申

賜安南國王陳光昞錦繡及其諸臣有差已丑立河南屯田命兵部侍郎赫德禮部侍郎殷弘齋國書復使日本仍詔高麗國遣人蕞送期於必達毋致如前稽阻詔諭安南國陳光昞來奏稱占城真臘二寇侵擾已命卿調兵與布爾罕併力征討今復命雲南王和克齊統兵南下可遵前詔遇有叛亂不庭為邊寇者發兵一同進討降服者善為撫綏車駕至自上都益都路饑以米三十萬八千石賑之復以史天澤為樞密副使冬十月

戊寅朔日有食之已卯敕中書省樞密院凡有事與御
史臺官同奏立河南等路行中書省以參知政事阿里
行中書省事庚辰以御史中丞阿里為參知政事壬午
詔恤沿邊諸軍其橫科差賦責鄂羅官償之庚寅敕從
臣托果斯等錄毛詩孟子論語乙未享于太廟中書省
臣言前代朝廷必有起居注故善政嘉謨不致遺失即
以和爾果斯圖古勒克翰林待制兼起居注敕給黎雅
嘉定新附民田戊戌宮城成劉秉忠辭領中書省事許

之為太保如故十一月己酉簽河南山東邊城附籍諸色戶充軍庚申宋兵自襄陽來攻沁山諸寨阿珠分諸軍禦之斬獲甚衆立功將士千三百四人詔首立戰功生擒敵軍者各賞銀五十兩其餘賞賚有差癸酉御史臺臣言立臺數月發擿甚多追理侵欺糧粟近二十萬石錢物稱是有詔褒諭免南京河南兩路來歲修築都城役夫十二月戊寅以中都濟南益都淄萊河間東平南京順天順德真定恩州高唐濟州北京等處大水免

今年田租敕二分二至及聖誕節日祭星于司天臺詔諭四川行省沿邊屯戍軍士逃役者處死復置乾州奉天縣省好時永壽入焉以鳳州隸興元路德興府改奉聖州隸宣德是歲京兆大旱天下戶一百六十五萬二百八十六斷死罪六十九人賜諸王金銀幣帛如歲例六年春正月癸丑高麗國王王植遣使以誅權臣金俊來告賜厯日西錦立四道按察司戊午阿珠軍入宋境至復州德安府荆山等處俘萬人而還庚申以參知政

事揚果為懷孟路總管甲戌益都淄萊大水恩州饑命

賑之敕史天澤與樞密副使駙馬呼喇珠董師襄陽二

月壬午以立四道提刑按察司詔諭諸道己丑詔以新

製蒙古字頒行天下丙申罷宣德府稅課所以上都轉

運司兼領改河南懷孟順德三路稅課所為轉運司丁

酉簽民兵二萬赴襄陽賑謙州人匠貧乏者米五千九

百九十九石敕鞍靴箭鏃等物自今不得以黃金為飾

開元等路饑減戶賦布二疋秋稅減半碩達勒達戶減

青鼠二其租稅被災者免徵免單丁貧乏軍士一千九
百餘戶為民癸卯給河南行省鈔千錠犒軍三月甲寅
詔益都路簽軍萬人給鈔二十五貫戊午賑曹州饑
築堡鹿門山夏四月辛巳製玉璽大小十紐甲午遣使
祀岳瀆大名等路饑賑米十萬石五月丙午東平路饑
賑米四萬一千三百餘石辛酉詔禁戍邊軍士牧踐屯
田禾稼六月辛巳以招討克們征建都敗績又擅追索
和爾璽書金符處死壬午免益都新簽軍單丁者千六

百二十一人為民丁亥河南河北山東諸郡蝗癸巳敕
真定等路旱蝗其代輸築城役夫戶賦悉免之丙申高
麗國王王植遣其世子堪來朝賜植玉帶一堪金五十
兩從官銀幣有差壬寅阿珠率兵萬五千人阮宋萬山
射梁岡鬼門闕樵蘇之路癸卯詔董文炳等率兵二萬
二千人南征東昌路饑賑米二萬七千五百九十石秋
七月丁巳遣宋私商四十五人還其國庚申水軍千戶
邢德立張志等生擒宋荆鄂都統唐永堅賞銀幣有差

辛酉製太常寺祭服壬戌西京大雨雹己巳立諸路蒙
古字學癸酉立國子學詔遣官審理諸路冤滯正犯死
罪明白者各正典刑其雜犯死罪以下量斷遣之又詔
諭宋國官吏軍民示以不欲用兵之意復遣都統領多
托爾統領王昌國等往高麗點閱所備兵船及相視耽
羅等處道路立西蜀四川監榷茶場使司宋將夏貴率
兵船三千至鹿門山萬戶解汝楫李庭率舟師敗之俘
殺二千餘人獲戰艦五十艘八月己卯立金州招討司

丙申以沙肅州鈔法未行降詔諭之詔諸路勸課農桑
命中書省采農桑事列為條目仍令提刑按察司與州
縣官相風土之所宜講究可否別頒行之高麗國世子
堪奏其國臣僚擅廢國王植立其弟安慶公曄詔遣鄂
爾多斯布哈李諤等往其國詳問條具以聞九月癸丑
恩州進嘉禾一莖三穗戊午敕民間貸錢取息雖踰限
止償一本息己未授高麗世子王堪特進上柱國東安
公壬戌豐州雲內東勝早免其租賦戊辰敕高麗世子

悵率兵三千赴其國難悵辭東安公乃授特進上柱國
辛未敕管軍萬戶宋仲義征高麗以呼喇珠史天澤並
平章政事阿里中書右丞行河南等路中書省事賽音
諤德齊行陝西五路西蜀四川中書省事車駕至自上
都鄂爾多斯布哈李諤以高麗刑部尚書金方慶至奉
渥表訴國王植遘疾令弟渥權國事冬十月己卯定朝
儀服色壬午陞高唐冠氏並為州丁亥廣平路旱免租
賦詔遣兵部侍郎赫德溜萊路總管府判官徐世雄召

高麗國王王植王弟湑及權臣林衍俱赴闕命國王特

訥克以兵壓其境趙璧行中書省于東京仍降詔諭高

麗國軍民庚子太陰犯辰星宋遣人餽鹽糧入襄陽我

軍獲之賜諸王鄂囉齊馳鈕金鍍銀印十一月癸卯高

麗都統領崔坦等以林衍作亂挈西京五十餘城來附

丁未簽王淳洪察珠爾軍三千往定高麗高麗西京都

統李延齡乞益兵遣孟格圖率兵二千赴之庚午敕諸

路鰥寡廢疾之人月給米二斗安南國王陳光昞遣使

來貢濟南饑以米十二萬八千九百石賑之高麗國王
王植遣其尚書禮部侍郎朴杰從黑德入朝表稱受詔
已復位尋當入覲築新城于漢江西十二月戊子築東
安渾河堤己丑作佛事于太廟七晝夜高唐固安二州
饑以米二萬六百石賑之析彰德懷孟衛輝為三路陞
林慮縣為林州改楨州復為韓城縣併省馮翊等州縣
十所以懿州廣寧等府隸東京是歲天下戶一百六十
八萬四千一百五十七賜諸王金銀幣帛如歲例斷死

金史卷六
罪四十二人

元史卷六

元史卷六考證

二年六月戊辰朔 原文作戊申據前丁卯後辛未考
之當是戊辰今改正

王晉罷 罷原文謔置按本年二月載山東廉訪使王
晉為叅知政事蓋至是罷去云今改正

三年伊蘇岱爾等僉行中書省事 原文作也速帶兒
他卷又作也速答兒也速達兒也速迭兒也速台兒
今併改

四年城中都 原文作大都按地理志云燕京至元元
年改中都四年始於中都之東北置今城而遷都焉
九年改大都此時尚未有大都之稱即志所云於中
都之東北置今城者是也觀下文三月敕中都路句
可見今據改

賜皇子燕王珍戩莽噶拉諾摩罕和克齊銀三萬兩

按燕王史原文遺其名既非通例莽噶拉為安西王
與燕王連屬文義亦牽混今據表增和克齊原文作

忽哥赤他卷又作愛哥赤今併改

五年三月丙寅 甲子 按干支中間相距五十餘日

舛誤顯然他書無可訂正仍闕疑下文九月癸丑己丑同

六年賑謙州人匠貧乏者 謙州原文作欠州按地理志載謙州因謙河得名去大都九千里居民數千家悉蒙古回紇人有工匠數局國初所徙漢人也史所云工匠貧乏者正指此當是謙欠音近而訛今據志

改後做此